

25 JUL 1999

Mahathir-Jadual

DR MAHATHIR LAWAT TERENGGANU KHAMIS DAN JUMAAT INI

KUALA TERENGGANU, 25 Julai (Bernama) -- Perdana Menteri Datuk Seri Dr Mahathir Mohamad mempunyai aturcara yang ketat dalam lawatan kerja dua hari ke Terengganu mulai Khamis ini.

Setiausaha Perhubungan Umno Negeri Datuk Tengku Mahmud Mansor berkata, Perdana Menteri dan isteri Datin Seri Dr Siti Hasmah Mohd Ali dijangka tiba di Lapangan Terbang Sultan Mahmud di sini pada pukul 9 pagi, Khamis ini.

Pada hari pertama lawatan kerja itu, Perdana Menteri akan mengadakan pertemuan tertutup dengan Jawatankuasa Perhubungan Umno Negeri di Wisma Darul Iman pada pukul 9.30 pagi dan diikuti perjumpaan dengan pegawai dan kakitangan Kerajaan Negeri dan Persekutuan di Dewan Besar Wisma Darul Iman pada pukul 11.30 pagi.

Dr Mahathir kemudiannya akan menghadiri majlis makan tengah hari bersama-sama pegawai dan kakitangan kerajaan di U2, Wisma Darul Iman pada pukul 1 tengah hari, katanya kepada pemberita di sini, hari ini.

Beliau berkata pada sebelah petang Dr Mahathir akan mengadakan perjumpaan tertutup dengan pemimpin-pemimpin Umno negeri di Dewan Konvensyen Wisma Darul Iman yang dijangka dihadiri oleh kira-kira 300 orang.

Tengku Mahmud berkata pada pukul 5 petang pula, Perdana Menteri akan menghadiri majlis pemimpin bersama rakyat dan meletakkan batu asas tapak projek perumahan awam di Kubang Parit, di sini.

Kira-kira 18,000 hingga 25,000 orang termasuk semua pemimpin Barisan Nasional (BN) serta petani, peladang dan nelayan dijangka menghadiri majlis pemimpin bersama rakyat itu, katanya.

Beliau berkata pada sebelah malam, Dr Mahathir dan Dr Siti Hasmah akan ke Dungun dan menghadiri majlis perjumpaan dengan pesilat negeri di Padang Astaka, Dungun.

Jadual hari kedua lawatan Dr Mahathir akan dimulakan dengan makan pagi bersama pemimpin-pemimpin BN di Seri Molek Inn, di Dungun.

Tengku Mahmud berkata Perdana Menteri kemudiannya akan mengadakan perjumpaan dengan nelayan di Kampung Seberang Pintasan, Dungun dan pada majlis itu beliau akan menyampaikan komputer kepada anak-anak nelayan yang terpilih.

Kira-kira 7,000 hingga 8,000 orang dijangka menghadiri majlis itu, katanya.

Beliau berkata Dr Mahathir dijangka berlepas ke Lapangan Terbang Kerteh pada pukul 10.30 pagi dan mengadakan persidangan berita di lapangan terbang itu pada pukul 11 pagi.

Dr Mahathir dan isteri dijangka berlepas pulang ke Kuala Lumpur dengan penerbangan khas pada pukul 11.30 pagi, katanya.

-- BERNAMA

SN PR